

վարդապետն և Մարտիրոս վարդապետն առ իւրեանս
կամէին լինել: Աստուածատուր վարդապետն կամէր
ընդ նոսա լինել, արգելոյր զնա և ոչ թողէր աշա-
կերտն նորին Մարտիրոս վարդապետն որ ունէր առ
Եղիազարն ուխտ սիրոյ առ միմեանս թէ Եւեթ զբանս
մեր յառաջ տաբցուք, զի մի խոխտասցի ի վերայ
մեր ազգն Յունաց, և միաբանօքս մեք ընդ քեզ եմք:
Վասն որոյ և խօճայքն և չէլէպիքն զարարքս նոցա
ոչինչ համարեալ թէ Զինչ եղջիւր բարձրացուցիք
այդու. և աղճատէին զվարդապետսն ի դրունս բռնա-
կալաց և առ մեծամեծսն. և ևս գնացին ի գանկատ
առ քէհապէկն և առ քհնեա վէզիրին, զի կորուսցեն
զմի ի նոցանէ և կամ աքսորեսցեն զո՛ր և կամիցին:
Յայնժամ կոչեալ քէհա վէզիրին զԵղիազար վարդա-
պետն և ասէ. Գանկատաւորք կան զքէն, ի՞նչ է ա-
բարմունք քո, զի՞ նեղացուցանես զԺողովուրդն. յե-
րէկ էր որ ի մահուանէ ազատեցար, որ ապստամբ ա-
նուն էիր. և անացուցանէր զնա յոյժ թէ Զքեզ ծա-
նիր: Եւ նա ի գողման լեալ՝ երկուցեալ եկեալ առ ի
խորհուրդ, և ասաց Մարտիրոս վարդապետին եթէ
Լե՛ր պատրիարք զի փնաս ոչ կրեսցուք, բազում
ստիպմամբ. թէ՛ Ամենայն անձն մի եմք և թէ դրամ
պիտոյանայցէ, որքան ի մէնջ լիցի, թերեւս զնոսա
այսու սանձեսցուք. զի յոյժ լինէր բազում կռիւն,
մինչ յիսն Մայիսի ամսոյ զօրհանապազ: Եւ գնացեալ
Մարտիրոս վարդապետն առ քէհա վէզիրին, և որպէս
յառաջն էր ճիմ ըստակ դիմոսական հարկն, որ ասի
միրի՝ այն խօսիւք և բանիւ առնէր զպատրիարքու-
թիւն յարքունուստ: Եւ վէզիրն ասէր. Գայցէ առաջի
իմ ռայա՝ զի տեսից թէ խնդրեսցե՞ն: Եւ վասն այսմ
բանի և խաղաղանալոյ և վասն միրիին ոմանց գիտե-
լով և ոմանց անգիտութեամբ գնացին ի դրունս վէ-
զիրի և կամիմք ասացին. և ուրախանալով վէզիրն ընդ